

萬 有 文 庫

第二集七種

王 雲 五 主 編

升 菴 全 集

(四)

楊 慎 著

商 務 印 書 館 發 行

升菴全集

(四)

楊慎著

國立學基本書

王雲五主編
萬有文庫
第二集七百種

升菴全集
八冊

中華民國二十六年三月初版

鎮徐

著作者

楊

慎

發行人

王

上海河南路

雲

五

印刷所

商

上海河南路

務印書館

館

發行所

商

上海及各埠

務印書館

館

(本書校對者 龍旭光 徐鼎銘 潘其璇 劉培慧 周蓋侯)

升菴全集三十一卷

七言律詩

春日訪樊九岡幽居

九隴岡頭紫氣浮。高人元是列仙儔。黃花晚節開三徑。翠竹清風臥一邱。松菊微行常伴鶴。苔磯獨釣不驚鷗。伊余南北東西者。浪跡深慙下榻留。

春三月四日仰山余尹招遊疏江亭觀新修都江堰

疏江亭上眺芳春。千古離堆跡未陳。矗矗樓臺籠蜃氣。營營原隰接龍鱗。井居需養非秦政。則堰淘灘是禹神。古圖經深淘灘淺則堰今改則爲作非也爲喜灌壇河潤遠。恩波德水又更新。

周五津寄錦箋并東楊雙泉

誰製鸞牋迥出羣。雲英膩白粲霜氛。薛濤井上凝清露。江令筵前擘綵雲。窈窕翠藤盤側理。連環香玉剪回文。老來無復生花夢。錦字泥絨付墨君。

中元夕望開福寺燈塔

鈴語吟風寂梵音。塔燈擎月淨高深。孟蘭瑞草生三昧。天竺曇花散五陰。鴈沼恍疑星宿海。鷲峰幻作火珠林。西方謾說光明藏。何似中華地布金。

寄夏松泉 名邦謨

山中睡起三竿日。天上書來五朵雲。念我獨愁開閤寂。感君長跪謝殷勤。兩年故國交遊隔。千里同心岐路分。奇樹華滋看已徧。不禁春色惱離羣。

郭縣子雲閣

落景登臨縣郭西。坐來結構與雲齊。平郊遠訝行人小。高閣迴看去鳥低。林表餘花春寂寂。城隅纖草晚萋萋。酒闌却下危梯去。猶爲風烟惜解攜。

立春日禁中對雪

天街晴雪照簾櫳。萬戶千門似郢中。先向曉營添朔氣。却隨春仗轉條風。上林花信梅邊出。太液波聲柳外通。郢客高歌誰屬和。已人下曲本難工。

戊寅九日龍門登高

江山盤踞千年地。風雨崔嵬百尺臺。搖落霜林秋籟發。參差雲堞曉光開。四愁多阻張衡望。九辨堪興宋玉哀。望遠登高聊自遣。芳萸豔菊漫相催。

沐希甫葉道亨約會於太華寺雨中用杜少陵韻一首

野竹幽花夾道迎。紺園金刹望中明。海天風色雲籠樹。山國春寒雨滿城。最覺龍鱗圖畫潤。生憎鳥羽毳衣輕。迷源復作留連住。尋壑猶能窈窕行。

冬夜宿羅漢寺

霜林金碧迷青紅。木葉蕭蕭澄遠空。長湖洲渚亂吞吐。上方樓殿森玲瓏。廊僧暝汲怯寒溜。舟子夜語驚
天風。朝曦照檻堪一望。羨爾冥冥高翾鴻。

石岡沐公希甫輓詩

幾醉錦筵金叵羅。忽騎天驕上天河。霸陵猶記將軍獵。沛邑能忘猛士歌。春寒澤畔經過少。日暮山陽涕
淚多。露薤霜蒿悲自古。踐桃營柳奈君何。

關索廟

關索危嶺在何處。猿梯鳥道凌青霞。千年廟貌猶生氣。三國英雄此世家。月捷西來武露布。天威南向陣
雲除。行客下馬一酌酒。候旗風偃寒吹笳。

高嶠村除夕

海濱戎旅久忘歸。獨對朝嵐與夕霏。莎徑晴沙采樵路。柴門春水釣魚磯。太平時節身難遇。流轉風光賞
莫違。街鼓市塵渾隔斷。村舂隣火自相依。

謝同鄉諸公寄川扇二首

鳳簃分封到海陬。魚絨千里自巴邱。綺寮白晝懸明月。珍簟朱炎借早秋。執素底須誇蜀畫。蒲葵耐可污
銀鈎。仙家玉雪勞相贈。詩苑瓊瑤愧未酬。

對青筠膜清霞斑。渥紫楞膏鍊月顏。

樽小
楠也

自覺金風爽仙馭。誰將玉雪灑人寰。薛濤歌裏揚清嘯。卓女吟

邊障遠山。萬里橋西銷暑會。幾回瓊樹夢中攀。

卽席贈樊九岡黃梓谷

中涓西蜀兩高人。良會通家及上春。青歲掛冠甘隱逸。早時揮麈靜風塵。身閒正好啣盃數。情洽何妨命駕頻。更與衡門添盛事。聚星堂上繼荀陳。

贈內

迢遞鄉關隔益州。歸途雨沛更雲油。重看周雅歌祁父。又聽陽關唱杜秋。明月迥臨天左界。寒霄回夢浪西樓。五紋絲履休勞寄。好看生兒以阿侯。

壽敘菴司馬弟生辰正月十一日

酉君初度早逢春。千里相思隔錦津。棣萼連枝情不盡。筆花池草夢何頻。廟堂閒却絲綸手。山水能娛樂壽身。繞膝斑衣常蔗境。何須止酒負芳辰。

送胡東渠少參致仕歸晉陽

醇綬辭榮賦北征。急流勇退見高情。元龍湖海多豪氣。長孺朝廷有直聲。

胡曾爲郡。不
屈節溫州相。

塵世已破枕中夢。杯

酒況兼身後名。祗恐清風遺遠徼。聊將公是托詩評。

與諸弟別樂菴弟約有江陽之會

中宵風雨早來涼。謝草春池別夢長。綠野開筵聯玉樹。紅亭離思結垂楊。通波直下無千里。明月何曾是

兩鄉白晝看雲何限意。佳期良晤在江陽。

宋潛溪方遜志二賢祠亭陪東臯狷齊坐

青蘿太史赤城仙。祠墓東西近接連。江漢炳靈遷謫地。乾坤正氣革除年。華池澹佇滄浪水。栢寢寒通雪嶺烟。不向一臺逢二妙。何由投簡和新篇。

合州舟中次韵王孔昭名嘉賓

馳暉易逝髮難玄。屈指驚心二十年。北渚離愁芳草外。東風歸信落花前。煙開巴峽銅梁秀。月照涪江石鏡圓。栩栩瀛洲還舊夢。嚶嚶喬木又新篇。

雪後曾前溪憲副夜過曾名鈞

閉門寂寂夜先扃。窮巷俄傳暢轂經。迢遞驕牙聲已到。熒煌騎火夢初醒。淮山桂樹懸鄉月。漢節梅花照客星。清興不辭淹雪棹。濁醪還共醉雲亭。

晏寢漫興

少年愛睡苦不足。鷄鳴催入承明宮。蹀躞金珂響斜月。丁當玉佩搖迴風。共憐人馬輝光異。肯信簪屨拘攣同。老便晏寢北窻北。起看日生東海東。

重寄張愈光

海客張公鬢已蒼。豪遊曾結少年場。古文金碧盤龍虎。麗句瓊瑤琢鳳凰。尋壑徑邱穿窈窕。倚樓看鏡立蒼茫。朔風鴻鴈傳消息。明月青山隔幾鄉。

海裔江湄獨倚樓。瑟居匏繫又驚秋。菊花黃處回青眼。楓葉紅時對白頭。少日聲名追杜甫。暮途韞紲絆脫莊周。九龍尚有臨池興。一鴈能忘遠札投。

寄藍玉夫名田

四海風紀藍御史。廿載逃名卽墨城。青冥鴻飛日月白。紫淵龍臥波濤清。晴窻香芸拂蟬蠹。春谷喬木歌嚶鳴。總角懽遊忽衰老。握鏡愁看華髮生。

登海寶寺望侍御唐池南瑤別業因贈

橫紫煙光疑上方。人家宛在水中央。一重一掩肺脯地。某水某邱遊釣鄉。憶我頻年枉書札。與君連日醉壺觴。詩瓢不似山人瘦。大雅堂高接盛唐。

夏日抱病幽居

抱病閉門誰與同。隱几焚香長夏中。槐花細灑鶯黃雪。芭蕉斜扇青鸞風。蚊雷無賴鼓昏黑。螢火多情流暝紅。墨池過雨積新溜。一部鳴蛙何太雄。

泛蓮池晚歸

桂棹蘭舸泛碧漪。菱塍蓮蕩倒芳卮。十三鴈足傳情徧。二八蛾眉度曲遲。玉樹風前人散後。金波水上月明時。良辰勝會應難續。風雨連宵惱別離。

兩湖葉道亨泰招飲過湖晚歸

楊堤葉嶼迥相隣。東主西賓意自親。促席忽披千里霧。歸舟重醉兩湖春。沙邊漁火明還暗。樹裏人家認

未真已訂魚鄉鷗社約。片帆何惜往來頻。

寄楊弘山都諫士雲

螭頭早掛進賢冠。跡遠東墀玉笋班。倦意已還飛鳥外。歸心元在急流間。仙郎高議留青瑣。學士新詩滿碧山。十九峯前同醉處。夢中瓊樹幾回攀。

唐僖宗行宮遺礎次熊尚弼侍御韵名相

唐帝行宮有露臺。礎蓮幾度換春苔。軍容再向蠶叢狩。王氣遙從駱谷來。萬里山川神駿老。五更風雨杜鵑哀。始知蜀道蒙塵駕。不及胡僧渡海盃。

礎今在僧寺

丁丑九日

燕臺九日罷登臨。節物蕭條入楚吟。關塞騷騷迷去路。朔風鴻鴈滯歸音。仙遊御宿山川遠。白露清霜日夜深。雲際側身愁北望。天涯懷抱可能禁。

己卯九日登高

采采黃花不滿衣。暝煙起望自朝暉。馬卿病裏芳菲晚。宋玉愁邊節序非。落水流波如有意。來鴻去燕故相違。消除強醉清樽酒。歸掩田家白板扉。

庚辰九日聞金鶴卿張惟信有彭門之會疾不克陪

一別黃金萬里臺。孤城三見菊花開。雲移北闕沾恩宴。日遠南山獻壽杯。抱病江天常閤寂。關心時序獨

徘徊。高人喜共登高會。咫尺彭門阻一陪。

定州書事

此地去年新駐蹕。行宮曾榜太平門。堯樽置酒中衢溢。梵宇揮毫古塔尊。漢帝樓船窮島嶼。周王車轍滿乾坤。多方獨使勞神武。諸將何由答主恩。

中秋禁中對月

漢家臺殿號明光。月滿秋高夜未央。銀箭金壺催漏水。仙音法曲獻霓裳。路車天遠鸞聲靜。宮扇風多雉影涼。千里可憐同此夕。美人迢遞隔西方。

四月廿日侍班紀事次金鶴卿韻

金殿朱衣引陛前。紫微清蹕從乾旋。登庸已卜璿璣正。顧命先從玉几傳。雨露恩垂周壤徧。星辰影動泰階連。詞臣況有如椽筆。好學王褒頌得賢。

送熊維藩尹婺川

驪駒載道何駸駸。飛鳥遙下蠻江潯。鴻鴈不度牂牁國。虎豹常啼楓樹林。鳴琴仙室白日靜。鎖印公堂朱夏深。冰蘗肯移清吏節。卉裳須服遠人心。

張崇象壁新居

碧山學士居茅屋。錦里先生過草堂。森森龍池接溝水。啾啾雀樹隱隣牆。何人問字能攜酒。有子攤書解滿床。巴曲肯來收下里。楚歌還擬和滄浪。

送高三峯公守大理

赤鳥青驄近侍臣。碧鷄金馬問行頻。南荒瘴癘禺山夜。北渚烟花洱海春。千里風謠采芳訊。十年雲會阻光塵。賜金已見先華省。鳴玉終期上紫宸。

次韵席仁同春遊昭應宮

佩聲齊下日華東。朝退春遊有客同。却轉河堤晴鶴外。迴瞻宮闕曉雲中。曲江池泛仙源碧。下苑花交御宿紅。瓊玖木桃酬未得。青門紫陌興何窮。

尙書九峰孫公壽詩

百尺貞標澗底松。四朝公望想儀容。星辰衡岳當朱鳥。雷雨湘江起臥龍。白雪郢歌翻壽曲。青雲奕葉繼仙蹤。天瓢滿注供春雨。三島遙應接九峯。

送福上人還青城

青城三十六高峯。寺在青峯第幾重。飛錫曾聞經雪嶺。結茅常愛住雲松。花飄香界諸天雨。金吼霜林半夜鐘。傳語禪關休上鎖。虎溪他日會相從。

慶成宴次張惟信韵

太乙天壇望燎回。九重春宴選辰開。廣庭列坐瞻華袞。合殿飄香入玉杯。海宇謳歌千載遇。雲門隊舞八荒來。共憐彩筆飄搖賦。獨有金門侍從才。

送毛東鎮給諫用成之子

憐君忠節之子孫。公車待詔重高門。江湖魏闕子牟遠。墓田丙舍鍾繇存。伏蒲內殿有膝跡。請劍上方猶血痕。鳳雛驥子定須繼。懲羹吹齏非爾倫。

次韵劉潤之歲暮見懷

江曲橫煙遠樹低。衡門榛草晚萋萋。美人明月勞相憶。遊子浮雲夢不迷。桂水舟航天塹北。松州車馬雪峰西。愁來擬對公榮酒。醉裏放歌嚴氏溪。

次祝鳴和中秋對月韵

閑夜試看中夜月。桂花正在散花樓。仙客星軺下碧漢。美人舊隱懷丹邱。已聽笛奏亂歸思。更對窻光驚醉眸。一水盈盈隔千里。佳期不共謝莊遊。

高泉臨行再賦此以別

異鄉流落倚名公。公去窮荒望益窮。客路萬三千里外。仙居七十二泉中。昌黎仰斗台光遠。靖節停雲時雨濛。鍛羽涸鱗去安所。翻飛川詠幾時同。

七言排律

寄題楊凌泉水木清華堂

宛宛闌干石徑斜。悠悠水木湛清華。橋通玉局仙人館。隣接金繩大士家。翠鎖渭川千畝月。紅蒸杜曲一園花。劉安招隱歌叢桂。屈子離騷賦折麻。嵐竊望山堪拄笏。陌塵流水任行車。閭兒好掃青苔壁。欲把新詩落墨鴉。

觀三塔寺龍女花

天女來看龍樹花。空香隨步惹瓶沙。烟花點綴慈雲薄。韶景留連慧日斜。鬢髮曉霑三昧雨。羅綿夜妬六銖霞。偷啣野鹿羞塵世。共命巢禽隔海涯。水泛暗通金母島。風飄曾到玉皇家。誰教博望來西域。不並蒲桃上漢槎。

高峽積雨始晴遲簡西賢

長湖射雨萬鏃雄。屋角掛龍池飲虹。亭亭玉筍繞山閣。森森銀竹圍屏風。織女下機絲霧野。綃人入市珠跳空。畫圖未盡輞川妙。詞賦詎信陽臺工。停雲已拖楚練白。倒景忽放燕脂紅。綠蟻幸自盈鑿落。黃鷄不用歌玲瓏。

長江萬里圖

五才坎德迥靈長。萬里岷山始濫觴。流漢天迴經灩澦。盤渦谷轉下柴桑。楊瀾左蠡曾潭府。大壑歸虛廣莫鄉。天遣陽侯分淼淼。帝咨神禹畫茫茫。岑青翠觀蛟人館。水碧金膏龍伯堂。景浴陽烏朝旭早。飲然陰火夜霞光。烟寒星散三洲樹。風致雲飛百尺檣。鶴子鳬雛喧澍雨。紋螺錦蚌映翔陽。龍筒津鼓驚浮客。欸乃漁歌屬報郎。泗磬石鐘鏘島嶼。輕漣頻彩媚滄浪。投鞭堪笑苻堅策。靜練難賡謝眺章。彩鷁退飛休借問。白鷗浩蕩信徜徉。

升菴全集三十二卷

五言絕句

青橋夜宿

驛亭臨白水。石榻滿蒼苔。遠客潭無夢。江聲枕上來。

宿華亭寺二首

花樹高於屋。紅霞夜照人。聲聲枝上鳥。也似惜餘春。
天風與海水。鳴籟隔山聞。半夜衣裳濕。清朝樹樹雲。

雨夕避漏起坐二首

滯雨蒼山夜。停燈伴獨愁。詰朝明鏡裏。華髮颺先秋。

其二

雲房遷雨榻。枕席籍盆罌。似向東林宿。蓮花滴漏聲。

積雨始晴

霽曉憑高處。涼風吹我襟。海天堪倚杵。嶺樹小如簪。

三塔秋日

始見椒花綠。又驚椒實紅。客心正鬱鬱。作底對秋風。

陽橋驛

澗壑浮白雲。俯瞰低於馬。雲開見青松。又在澗壑下。

西路雜述五首

沙遠名乾海。坡高號望城。海曾無滴水。城亦是虛名。

其二

路學盤蛇上。人緣磨蟻旋。深於小有洞。陰過大漫天。

其三

濯足倒流水。回頭相見坡。馬嘶人又倦。落景在烟蘿。

其四

虎穴猶能入。猿梯亦可臨。把關苗子面。開店主人心。

其五

哨名一碗水。坡號半邊山。疲人倚石磴。渴馬飲冰湍。

卽事一絕

蘋末清風起。涼生近水樓。盈盈樓上女。齊唱楚江秋。

四月五日夜與敍菴末菴樂菴得菴話別集句

鼎鼎百年內。一別一回老。欲知萬里情。坐對青燈曉。